

Phexiroosa Xaafide Lam7intsa Kiita Gele

Hawaare Phexiroosa xaafide lam7intsa kiita xaafinttide, dumma dumma bessa yeze zaga ammanze asuntsis. Hyay kiitize aafe qoftta, worddo asttamaarunts iita oochiton un timirtiti baggara medhinttide yeellize oochito ixkode fana. Yinna medhinttide madhito kayodes oge maaqqode, Yesuusa fa aafte bi7ide asuntsin E tamarssize wode fa hyayte si7ide asuntsi tamarsside timirtiti baggara Xoozze bazin Laatstse Yesuus Kiristtooabaz ammanitsize era ekkode fana. Xaafize mintsii ohide, «Kiristtoosa lam7intsa yo7oda» yagaaze worddo timirttebaz. Yinna qoftto mintsii ohitera, «Kiristtoosa maaqqii yi7ikaayzara gam77idanna, asuntsi ubba fa nagarappa maaqqode fana fattin ooden dhabode fana koyoose gishos» yagayda.

Aafe Qofuntsi

Saritse 1:1-2

Ammanze asunts xeeqintte 1:3-21

Worddo asttamaaruntsana 2:1-22

Kiristtoosa lam7intsa ye7e 3:1-18

¹ Yesuus Kiristtoosa hawaaren E aro, taanii, Simoon Phexiroosa, nu Xoozzen nuna ashshize Yesuus Kiristtoosa xillotitsiti baggara nu gaar al77o ammano ekkiduntsis hyay kiitiza xaafida.

² Xoozzan nu Laatsta Yesuusa erera aadho keehatitsin saro yinttis kumo.

Xoozze xeegeen dooren

³ Fa bonchchiten lo77otitsite nuunii shaakkintode fana xeegeide eza eridanne xoozzetits wolqqa nuunii Xoozza aazii yessades koshshize baz ubba nuus inggida.

⁴ Yin iita amo baggara medhinttize hyanna alamite yeze dhabsseppa kessii ekkode fanan Xoozze xoozzetitsito shaakkintode fana, hyanna imotitsiti baggara gaama al77on damma ufayssi nuus inggida.

⁵ Yinnii gisho, miinggi, yin ammantilla afa lo77otitsi, lo77otitsalla afa eratitsi,

⁶ eratitsalla afa fana naage, fana naagella afa gence, gencella afa Xoozza ufayssi yessi yeze,

⁷ Xoozza ufayssi yessalla afa ishitimo kadhe, ishitimo kadhella afa as ubba siiqe gujjote.

⁸ Hyantses yinttis gaanggi yeziko, Laatstsi Yesuus Kiristtoosa erera maaddize asin aafara yeze asi maaqqoda.

⁹ Yezin hyantses baayze oonin ukke yeze baz xalaala be7ize qooqe. E fa tiino nagarttipa geezhidanno botida.

¹⁰ Yinnii gisho, ta ishuntso, yin xeegintton yin doorintto mintsodes kasennippa aatsii minggote. Yin hyantsesana oochchizebaz maaqqiko, dhubunttaama.

¹¹ Yinne nu Laatstsan nuna ashshide Yesuus Kiristtoosa medhina ka7itumo gelize kumutsi wolqqa yinttis ingginttoda.

¹² Yinnii gisho, yin hyantsesana erize bazin yinna aykkide turite miinggi yeze baz maaqqiko, taanii hyantsesana ubba wode yinttana qofize ashshoos.

¹³ Taanii shemppora yeze wode ubba yinttana qofizanna koshshize baz ga7i qoppaane.

¹⁴ Nu Laatstse Yesuus Kiristtoosa taas goncizidanni fana taanii hyanna hyayqqize galtto gaarii olii qitodanno erane.

¹⁵ Taanii yinttappa shaakkinttikon yin hyantsesana ubba wode qoppode fana taas dandda7inttize baz ubba oochchoda.

¹⁶ Nuunii Laatstse Kiristtoosa wolqqan E ye7ito yinttis ohize, E damma bonchchito nu aafte bi7ida fattin medhdhii kesside tosse baaya.

¹⁷ Damma wolqqaama bonchchoppa, «Tana ufayssize, ta kadhize na7ay hyaya» gaaze qaala ootsi yi7ide wode Xoozze adeppa bonchchon galata ekkida.

¹⁸ Nuunii geeshi derella afa eera yeze wode yinna qaala ootsi saloppa ye7izin si7ida.

¹⁹ Nuus hyannippa aadhize ammaninttide tinbbite qaala yene. Sa7a wonttode wontsisin goolixe yin wozintte dolode wontsis, dhuma besa yeze foo7oos asi naaginttize fana, yin hyanna qaaltto naagiko lo77o oochchane.

²⁰ Ubbappa tiino hyanno erote. Geeshi Max-aafite xaafinttide tinbbite qaala ooden fa koyde fana billodes dandda7oos.

²¹ Tinbbite ubba, Xoozze kiittide asuntsi Geeshi Ayyaana kaalitsin, ohida fattin as qofara ohikaaya.

2

Worddo asttamaaruntsana

¹ Yezin worddo nabuntsi zaga wode asunts gidda yezanni fana hyatten worddo asttamaaruntsi yin gidda denddoda. Un fana wozide, Laatsta kaddii, dhabsize worddo timirtte ko7oda. Yinne un faalla afa ellisii dhabe ke7ine.

² Gaama asuntsana yeellize un iita oge kaaloda; un baggara turii oge cazhinttoda.

³ Worddo asttamaaruntsi miishe zhimbbaratti fa faas medhdhii kesside taariiker yinttana bonqoda. Zagappa dentsii untis firda giigii bettida; untana dhabe naagii bettida.

⁴ Nagara oochchide kiitanchchuntsis Xoozii yiqsinttanxi, firda qamma yellodes gaanname dhuma doochcha untana olida.

⁵ Yinnii fanan, Xoozii xillotitsbaz ohize Nohen melle laappun asuntsana ashshii, Xoozza goynoose asuntsi yeze zaga alamito yiqsinttanxi dhabe hyaatsar dhabsi maarikaaya.

⁶ Nagara oochchizuntsis aazize maaqqade fana Soodoman Gamooraa katamtto budo mahi eetsii dhabsida.

⁷ Higgis kiitinttoosse olale hyanttize asunts gidda waayintti yezide xillo Looxe Xoozii ashshida.

⁸ Ye xillo atstse un gidda yezitera, un oochchize iita oochito ubba wode bi7ide woden si7ide wode E lo77o wozintta un7inttane.

⁹ Yinno maaqqiko, Laatstsii, fana goynize asuntsana fatanappa wayzi ashshod yezako, mahi nagaranchchuntsana firda qamma yellodes wayzi seerittera naagisadyezako erane.

¹⁰ Ubbappa aatstsii tuna amora asho qofa kaal-lizuntsanan Xoozze adetits wolqqa borizuntsana, firdda qamma yellodes Laatstsii naagizida.

Yentsi asuntsis wozina mintsin uturtizuntsana maaqqide gisho salo medhetuntsana cazhittera zhashtoos.

¹¹ Yezin kiitanchchuntsi worddo astta-maaruntsappa wolqqaran xaalatitsara gaama aadhane yezin Laatstse tiino adetits wolqqa yeze salo medhetuntsana cazhoos.

¹² Yezin yentsi asuntsi fa eroosse baza gelii cazhane. Un aykkinttodesin hyayqqodes giigint-tide, wozina baayze xoots fana hyanane; untin xoots fana cer dhaboda.

¹³ Un nagara oochchide gisho fa oochito ekkoda. Awarara matsintti yexxitera doollizanno ufays baz ga7i qoppaane. Un borinttii tuna maaqqii yinttara yezitera yinttara shaakkinttize siiqo mukkitera ufayttane.

¹⁴ Olale hyantta kumiden nagara ashshoosse aafe yene; mahi nagara oochchizanno ashshoos. Ammanora minggikaayze asuntsana cimmane. Unttis ubba wode amudhdhize wozina yene; un baaddinttiduntsana.

¹⁵ Un luule oge ashshii, gene miishe yiqsinttii balide, Bi7oora na7a Balaama oge kaallida.

¹⁶ E fa nagartti gisho seerinttida; ohodes dandda7oosse hyartta asi fana ohi nabize eeyatit-sito teqqida.

¹⁷ Yentsi asuntsi melide hayaatsi aafe fanan zhuubba tookkii kanggize dhonne fana; untana naagize linxi yiide dhuma.

¹⁸ Un cer utura qaala ohinttitera iita baz oochchii yeze asunts giddappa kezii hyaga mi- inggikaayze asuntsana olale hyanttaran asho amoran cimmii balitsane.

¹⁹ Un faasi dhabe arotitsa yezitera melluntsago, «Yin arotitstsappa kessada» yagaane. Akkos gayko, asi fa gaminttide baz ubbas aro.

²⁰ Un ashshize nu Laatstse Yesuus Kiristtoosa erii hyanna alame tunatitsitippa kessii ekkideppa suuba, mahi qaxintti gaminttiko tiino yeze yest- tippa suubanna untis wozzi iita maaqqada.

²¹ Un xillotitsi oge erii maaqqii ashshizan- nippa tiino geeshi kiitto erikaayzako untis lo77o yeshsha.

²² «Kana fa cooshago suub maaqqane» mahi, «Meeccinttide gudayille suub maaqqii looqa gidda gol7inttane» gaaze aazize turo maaqqizanna unt- talla afa folinttida.

3

Laatstsii yo7oda

¹ Ta siiquntso, hyay ta yinttis xaafide dabd- daabbize lam7intsa. Taanii hyantsi lam77i dab- ddaabbuntsana yinttis xaafide, yin luule qofa qoppode fana yinttana dentsitsodes.

² Mahi geeshi nabuntsi zaga ohide qaalaran nuna ashshize Laatstse, hawaaruntsi baggara kiitinttide kiitto yin oochchode fana koyane.

³ Ubbappa tiinidhii, wode wurssutsite fa amito kaallizuntsin borizuntsi borittera yo7odanno erote.

⁴ Un, «Laatstsi Yesuusa yo7oda gaydanna aba yene? Nu aduntsi hyayqqida, yezin ubba bazi

sa7a medhinttideppa dentsii yezanni fana yene» yagaane.

⁵ Gaama wodeppa tiino salo Xoozze qaaltte medhinttidanno; mahi sa7a hyaatsappa medhinttidannon hyaatsi gidda medhinttidanno erit-tera kaddane.

⁶ Yinna wodite yeze sa7ita hyaatsara qoodhintti dhabida.

⁷ Yezin hyatte yeze salttan sa7itan, Xoozzes goynoosuntsi firddinttize qamman dhabode qamma yellodes yinna qaaltte tamas naaginttii yene.

⁸ Yezin ta siiquntso, Laatstse kale fettii qamma mukul bere fana maaqqizanno mukul bere fettii qamma fana maaqqizanno hyanno fettii baz botippete.

⁹ Fete fete gam7ida ga7i qoppizannii fana, Laatstsii fa ufays qaaltti gisho gam7oos. Yezin ooden dhabaame fana koyi ubbuntsi fa nagarttippa maaqqade fana yin gisho ga7i dandda7ane.

¹⁰ Yezin Laatstse qamtta kayzo fana yo7oda. Yinna qamtte salo damma guumera dhaboda; salo medhetuntsi tamara eexinttoda; sa7an izilla afa yeze ubbanna dhaboda.

¹¹ Yikke, ubba bazi yinnii gaar yii7i dhabizebaz maaqqiko yin waako yeze asi maaqqades beeze? Yin geeshin Xoozii ufayssize yessii yessades beezane.

¹² Yin tiinora ye7ize Xoozze qamtto naagittera yinttis dandda7inttize baz ubba oochchii yinna qamtto ellisizote. Yinna qamtte salon ize yeze

bazi tamara eexinttoda; damma tama michara til⁷⁷oda.

¹³ Yezin nuunii xillotitsi yeze kille salon kille sa^{7a} Xoozze ufays qaaltti gaar naagoda.

¹⁴ Yinnii gisho, ta siiquntso, nu yinna qamtto naagize gisho yeellan bore baayzuntsana maaqqii, Laatstsara sarora yessades minggote.

¹⁵ Yin attode fana koyi Laatstsii dandda^{7ez}anno botippete. Mahi nu siiqo ishay, Phawuloosa, Xoozii ees inggide cinctatitsara yinnii fana yinttis xaafida.

¹⁶ E fa kiitite ubba yentsi bazito xaafida. E dabddaabbiti gidda qoppodes waaytsize qofa yene. Tamaarikaayzen miinggikaayze asuntsi melle Xoozze qaaltto wobbizanni fana hyanna kiitton faas dhabodes machchi wobbizane.

¹⁷ Yinnii gisho, ta siiquntso, yin yinno erize gisho genuntsi balara ciminttii, dhabaame fanan miinggi yeze baastippa gol^{7a}aame fana naagint-tote.

¹⁸ Yezin nuna ashshize nu Laatstse, Yesuus Kiristtoosa aadho keehatitsaran eratitsaran dic-cote. Ees hyatten medhinan bonchcho maaqqe. Amin^{77e}.

Kille Caaqo
The New Testament in the Oyda language of Ethiopia,
Latin script

copyright © 2025 The Word for the World International

Language: (Oyda)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-20

PDF generated using Haiola and XeLaTeX on 19 May 2025 from source files dated 20 May 2025

6edc256e-39e9-59ad-86cf-e1d4328a7cf2